



SARAJEVO

Број: 01,03,03/11-05-1-774/17

Сарајево, 6.4.2017.

PRIMLJENO 21-04-2017			
Organizaciona jedinica	Klasifikaciona oznaka	Redni broj	Broj priloga

B

**KOLEGIJIMA OBA DOMA PARLAMENTARNE SKUPŠTINE BIH
KOMISIJI ZA VANJSKE POSLOVE PREDSTAVNIČKOG DOMA
KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I
KOMUNIKACIJE DOMA NARODA
ČLANOVIMA DELEGACIJE PSBiH U PARLAMENTARNOJ SKUPŠTINI UNIJE
ZA MEDITERAN
KOLEGIJU SEKRETARIJATA**

**IZVJEŠTAJ SA SASTANKA KOMITETA ZA POBOLJŠANJE KVALITETA
ŽIVOTA, RAZMJENU ISKUSTAVA IZMEĐU CIVILNIH DRUŠTAVA I KULTURU
PARLAMENTARNE SKUPŠTINE UNIJE ZA MEDITERAN (PSUzM)**

Rim, 3.4.2017.

U Rimu je 3.4.2017. održan sastanak Komiteta za poboljšanje kvaliteta života, razmjenu iskustava između civilnih društava i kulturu Parlamentarne skupštine Unije za Mediteran. Na sastanku je učestvovala Delegacija Parlamentarne skupštine BiH u kojoj su bili: Hazim Rančić, predsjedavajući Delegacije, i Diana Zelenika, zamjenica predsjedavajućeg. Osim Bosne i Hercegovine, sastanku su prisustvovali članovi Evropskog parlamenta, zatim članovi nacionalnih parlamenata zemalja članica PSUzM: Alžira, Egipta, Izraela, Italije, Jordana, Latvije, Libana, Luksemburga, Palestine, Portugala, Tunisa, Turske.

Nakon usvojenog dnevnog reda, Khalid Chaouki, zamjenik predsjednika Komiteta za poboljšanje kvaliteta života, razmjenu iskustava između civilnih društava i kulturu PSUzM-a, istakao je da su glavna tema sastanka uzroci radikalizacije, što je veliki problem s kojim se svijet danas suočava. Od velikog je značaja upoznavanje parlamentaraca sa složenim društvenim problemom terorizma, njihovo aktivno učešće i razmjena iskustava s naučnog aspekta, kako bi mogli uticati na donošenje važnih zakona. Sastanak je održan s ciljem pripreme za plenarno zasjedanje PSUzM-a, koje će biti održano 12. i 13.5. 2017. u Rimu.

Učesnicima se obratio Benedetto Della Vedova, podsekretar Ministarstva vanjskih poslova Italije, koji je istakao da je u borbi protiv terorizma neophodno raditi na ekonomskom razvoju i ekonomskoj saradnji, obrazovanju mladih ljudi i integraciji multireligijskog civilnog društva, s obzirom na to da smatra da su glavni uzroci terorizma nezaposlenost i ekonomska kriza. Iznenađuje činjenica da je sve više mladih ljudi uključeno u fenomen radikalizma.


Alessandro Orsini, direktor Opservatorija za međunarodnu sigurnost LUISS Univerziteta – vanredni profesor sociologije terorizma Odjela za političke nauke LUISS Univerziteta, dugo

izučava problem terorizma. On smatra da se terorizam posebno razvija u zemljama kolapsa, u zemljama nezaposlenosti, te da ima manje mogućnosti razvoja u zemljama u kojima je vlada jaka i stabilna. Ističe da se u nekim slučajevima religija i ideologija koriste u političke svrhe, te da radikalisti nemaju teološku dimenziju i da je njihovo poznavanje islama veoma ograničeno. Također, koriste i džamije kao mjesta gdje se regrutuju i obučavaju.

Khalid Rhazzali, profesor sociologije i ljudskih prava na Fakultetu političkih nauka Univerziteta u Padovi, istakao je jedan drugi instrument koji sve više povezuje radikalizam, a to je internet, koji više nije moguće kontrolirati. Internet, kao i društvene mreže, zloupotrebljava se kao oružje, komunikacija među teroristima i medij za obraćanje javnosti.

Tokom diskusije učesnicima se obratio gosp. Rančić, koji je istakao da Bosna i Hercegovina preduzima određene mjere u borbi protiv terorizma. BiH je članica međunarodne koalicije za borbu protiv terorizma, te je izmijenila odredbe Krivičnog zakona, na osnovu kojeg se vrši progon osoba koje učestvuju u paravojnim aktivnostima. „Zemlja se uglavnom bavi posljedicama terorističkih činova i uglavnom se to svodi na krivično-pravni progon počinitelaca krivičnih djela, a vrlo malo energije se ulaže na utvrđivanje uzroka pojave terorizma.“ Rančić je naveo moguće razloge nastanka terorizma: raspodjela prirodnih bogatstava, npr. nafte i rijetkih metala; zatim, nasilno uvođenje demokratije putem ratova, prodaja oružja zaraćenim stranama. „Smatram da je na sceni opća borba za resurse na Planeti i da velike zemlje sve grabe sebi, a ostatku Planete ostaje malo.“ Rančić je naglasio da islam nije izvor terorizma. „Mi koji smo malo stariji, sjećamo se i IRE i ETE, Crvenih brigada i ostalih organizacija i nikad nismo pomislili da se radi o katoličkom, protestantskom, pravoslavnom ili nekom drugom terorizmu.“ Terorizam nema ni vjeru, ni naciju. Također smatra da islamofobija, koja je prisutna u vezi s terorističkim aktima u posljednje vrijeme, može biti povod za novu radikalizaciju. Zahvalio se profesorima koji su govorili o posljedicama terorizma, te gosp. Orsiniju za izjavu da je destabilizacija država i društava od strane velikih uzrok radikalizacije. Smatra da je za efikasnu borbu protiv svih vrsta terorizma i radikalizacije potrebno utvrditi stvarne izvore, uzroke i razloge njihovog nastanka, koji su zasnovani na struci i nauci.

Pripremila¹:


Lara Borovina,

sekretar Delegacije PSBiH u PSUzM-u

Dostaviti:

- naslovu
- Ministarstvu vanjskih poslova BiH
- a/a

¹ Uz saglasnost predsjedavajućeg Delegacije PSBiH u PSUzM